

臺 臺

灣 灣

紀 雜

略 記



2617

臺灣雜記
(說鈴之一)

季麒光 著

中華書局

此據龍威秘書本
排印初編各叢書
僅有此本

臺灣雜記

清 梁谿季麒光客洲著

雜記

金山在雞籠山三朝溪後。山主產金。有大如拳者。有長如尺者。有圓扁如石子者。番人拾金在手。則雷鳴於上。棄之卽止。小者亦間有取出。山下水中沙金碎如屑。其水甚冷。番人從高望之。見有金捧沙疾行。稍遲寒凍欲死矣。

火山在北路野番中。晝則見烟。夜則見火。有大鳥自火中往來。番人見之多死。

奇冷山卽奇嶺社之山也。其山高百丈。臺灣從無冰霜。山上三月中尙有未化者。

水沙連在半線東山中。方數丈。其口似井。水深而清。天將雨。潭中發響。水卽混濁溢出。潭外番人以此驗陰晴。

玉山在鳳山野番中。山最高。人不能上。月夜望之。則玉色璘璘。其上有芋一棵。根盤數間。葉已成林。有鳥巢其上。羽毛五色。大於鶴。土人俱指爲鳳。

淖泥島在臺灣之東南。其灘皆濕爛。人至泥上卽陷沒。舟行飄至灘邊。亦不能出。高處有番居之。最富。紅彝曾至其國。其南界可以入海。

臺灣多蛇。而內山尤大。曾有一蛇盤草坡。番人用鎗標之。中其兩層。蛇負痛旋捲半里。草地皆平。而蛇死。

番人取其皮闊五六尺長三丈。又有一蛇能起地比人。人見之即取土擲起。呼曰我高。蛇即翻身仰臥。舒足盈千人必散髮示之。呼曰我多。蛇遂收足伏地。人即取身衣帶盡斷之。呼曰我去矣。蛇遂死。

暗洋在臺灣之東北有紅彝舟泊其地。無晝夜山明水秀。萬花遍滿。而上無居人。謂其地可居。遂留二百人。給以一歲之糧。于彼居住。次年復至。則山中俱如長夜。所留之番已無一存。乃取火索之。見石上留字。言一至秋即成昏黑。至春始旦。黑時俱屬鬼怪。其人遂漸次而亡。蓋一年一晝夜云。

鴉猴林在南路草目社外。與傀儡番相接。深林茂竹。行數日不見日色。路徑錯雜。傀儡番常伏於此。截人取頭而去。今土官加老斯統制之。

黑水溝在澎湖之東北。乃海水橫流處。其深無底。水皆紅黃青綠色。重疊連接。而黑色一溝爲險。舟行必藉風而過。水中有蛇。皆長數丈。通身花色。尾有稍向上如花瓣六七出。紅而尖。觸之即死。舟過溝水多腥臭。蓋毒氣所蒸也。

暹羅別記

暹羅國者。西洋一彝也。歷朝修貢。皆自福州而入。其人知禮義。有朝鮮之風。其國皆平壤。無城郭。有山相距甚遠。山內多犀象及蘇木胡椒等樹。番民所居。傍皆栽檳榔。收時土分稅之。以售于中國人。王出入乘象。前導亦鳴令列戟。所戴如兜矛。而有銳向前。非玉非金。不知其何以爲之也。所衣皆錦。而赤腳跣足。無靴履。此則番彝之俗矣。國民俱造高樓。云其地通黃河。四月水至。皆黃色。王亦徙居遠山。民盡登樓以處。

牛羊犬豕亦畜於樓上。人則乘舟往來。蔬薪之屬以小舟貿易。夫黃河發源崑崙。北行入龍門。皆在西徼。今又南注於遼羅之域。豈其地與星宿海相連。而河流由此入海乎。抑行於中國者。又別有一道耶。且年有水則多收。無水則歉。禾播於田。隨水之大小必高出於水上。無淹沒之患。故水之來也。王必排駕出迎。八月水退。王又率臣民出送。始遼舊居。民亦退居樓下矣。其國另有字與中國異。行禮以拱手。上額爲恭。所鑄有錢。兼用貝子。有銅器聲大而清。今遼羅銅鼓爲音樂所用也。其往來之期。乘南風而來。臘月北風動則去。所帶貨物以布麥爲貴。從別洋以行。非琉球呂宋之水道也。

